

欽定八旗通志卷二百三十

人物志一百十

忠義傳二十二

漢軍八旗二
康熙年中共一百八人

祁熊嘉

祁熊嘉漢軍鑲黃旗人原籍廣寧康熙十三年以
監生隨四川總督周有德征叛鎮譚洪熊嘉督餉
軍前至保寧廣元縣遇賊却糧力戰歿於陣

賞卹如例

范承譜

范承譜漢軍鑲黃旗人閩督承謨族弟也康熙十三年耿逆叛羈承謨時承譜在署中並繫於獄誘之降承譜厲聲罵曰汝輩皆反賊吾寧死誓不從賊生也幽囚凡三載抗節益堅及聞承謨死遂捐軀以殉

恩賜國子監學正

楊廷瑜

楊廷瑜漢軍鑲黃旗人順治十五年以佐領從征
雲南圍沅江府賊悉衆拒戰連擊敗之康熙十二
年以叅領駐防杭州十三年奉命大將軍和碩康
親王傑書調隨副都統倭申巴圖魯征台州耿逆
僞將軍曾養性以萬衆拒戰於小梁山廷瑜力戰
陣亡

恩賜雲騎尉世職

承襲詳見
世職表

何九章

何九章漢軍鑲黃旗人任驍騎校康熙十三年隨副都統巴爾堪征耿逆敗賊於績溪至饒州雲峯山及石頭街並連敗之進抵饒州城偽叅將陳鳳拒敵力戰歿

恩賜雲騎尉世職

承襲詳見世職表

高爾瞻

高爾瞻漢軍鑲黃旗人康熙十三年以佐領從征逆藩耿精忠至江西十四年七月隨副都統雅賴

與賊戰於石峽新口被創歿於陣

恩賜雲騎尉世職

承襲詳見世職表

阿什圖

阿什圖漢軍鑲黃旗人原籍遼東姓周氏天聰五年從征大凌河錦州等處有功崇德七年任驍騎校八年隨大將軍多羅貝勒阿巴泰征明至山東取東平州首先登城是年攻前屯衛中後所率揆牌軍克之順治元年管佐領事隨都統墨爾根侍

衛李國翰等往征流寇率本叅領兵渡河擊敗僞
總兵張某獲馬五十六匹船十五隻二年從征山
西攻太原城督紅衣礮克之又從大兵南征攻拔
武崗寨又以本叅領紅衣礮敗鄭芝龍於楊子江
進攻江陰縣下之三年從征杭州擊敗僞國公方
國安渡江取金華府五年隨兵部尚書阿尼喀在
寶慶等處擊敗賊首二虎劉照馬盡忠等八年隨
平南將軍金礪征浙江舟山克之九年從征福建

攻海澄縣賊首鄭成功引賊十萬衆來奪紅衣礮
隨大兵擊却之以功授雲騎尉准襲二次十年任
杭州駐防佐領十一年隨寧海大將軍宜爾德征
舟山僞英毅伯阮思列舟百餘隻於海面拒戰隨
副都統柯永秦等擊敗之以功加世職爲騎都尉
十八年陞叅領康熙元年授協領尋陞副都統十
四年逆藩耿精忠叛率兵擊之與賊將曾養性祖
宏勲等戰於台州陣亡二十五年叙功加世職爲

三等輕車都尉世職

承襲詳見世職表

王宣

王宣漢軍鑲黃旗人任陝西固原遊擊康熙十四年提督王輔臣叛宣不屈遂被縊死

恩賜雲騎尉世職

承襲詳見世職表

李留

李留漢軍鑲黃旗人康熙十四年以佐領從定西大將軍多羅貝勒董額征逆藩吳三桂至陝西洋

縣接運糧餉遇賊青山關力戰陣亡

恩賜雲騎尉世職

承襲詳見世職表

王承恩

王承恩漢軍鑲黃旗人父登甲任二等輕車都尉
順治十六年襲父職康熙十四年授杭州駐防叅
領十五年隨康親王傑書征逆藩耿精忠十六年
隨副都統伯穆和林征海寇僞將軍劉國軒至海
澄力戰歿

賞卹如例

李有功

李有功漢軍鑲黃旗人原籍海澄以驍騎校駐防
杭州康熙十五年隨杭州副都統倭申巴圖魯會
剿偽將軍馬九玉等於衢州至江山縣力戰歿於
陣

賞卹如例

寶成傑

寶成傑漢軍鑲黃旗人康熙十三年以騎都尉從
征逆藩耿精忠至福建所在有功十六年閏三月
海寇偽將軍劉國軒率賊萬衆來犯海澄成傑隨
寧海將軍喇哈達力戰陣亡

恩賜祭葬立碑於墓

裴應虎

裴應虎漢軍鑲黃旗人原任二等輕車都尉登寬
之子也康熙十三年隨征西將軍席卜臣往陝西

漢中府征叛提督王輔臣賊將王屏藩譚洪率衆數千屯鹿角拒戰於猴子嶺應虎擊敗之又敗偽將軍劉慶成精騎數千偽總兵陳奉煥迎戰於張前湖營譚洪擁衆自中家營來援應虎率兵奮擊大破之又敗偽總兵楊應芳於溝家營十八年四月回至擂鼓臺山下王譚二賊率衆萬餘來犯力戰陣亡

恩賜世職爲一等輕車都尉

承襲詳見世職表

張璉

張璉漢軍鑲黃旗人康熙十三年以守備從征逆藩吳三桂十八年二月隨總兵陳溥在貴州臘雞坡地方遇賊力戰陣亡

恩賜祭一壇銀五百兩

恩賜五品官

李興元

李興元漢軍鑲黃旗人拔貢生初爲直隸沙河縣

知縣陞祁州知州任滿陞江西吉安府知府調直隸永平府陞長蘆鹽法道轉陝西隴右道陞雲南按察使廉得豪橫數人治之羣小側目復理沉寃數事名振邊境時有

旨察藩下霸占民子女爲奴者槩與釋放各還其家時逆藩吳三桂勢焰方熾興元秉公而行不畏強禦民間子女得完聚者約千餘人十二年冬三桂謀叛傳省府官會議遂脅授職興元抗聲叱曰汝內結

骨肉之戚分封親王受

朝廷

洪恩至矣乃忍作此事耶我執法官可殺不可辱惟一死以報

朝廷耳嘗罵不絕三桂桎械之併家屬入於獄歷六載三桂知其志堅送蒙化充軍十九年

王師將至雲南諸從逆者忌其口喉逆孫世璠使僞遊擊劉創基至蒙化縊殺之沒其家屬九十六人

囚於貢院二十年大兵困雲南急賊復取興元子
蔭秀蔭奇榜殺之先是季子萃秀匿民間得免大
兵入城家屬始得釋萃秀號赴定遠平寇大將軍
固山貝子章泰軍訴其父死事以

聞卹贈太常卿蔭一子入監

賜立碑銀三百兩遣官

諭祭萃秀由廕生歷官湖廣安陸府知府

朱國治

朱國治正黃旗人包衣漢軍順治四年由拔貢授
順天府固安縣知縣陞開州知州有治績超陞按
察司僉事分守霸昌道歷任大理少卿江蘇巡撫
丁憂解任康熙十年授雲南巡撫十二年十一月
二十一日逆藩吳三桂叛爲其所執罵賊不屈遂
被害

賜祭葬

恩贈戶部右侍郎雍正七年